

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj : 32 0 St 486518 25 St
Tuzla, 30.07.2025. godine

Općinski sud u Tuzli, stečajni sudija Vedran Milašinović, u postupku predhodnog ispitivanja prijedloga za otvaranje stečajnog postupka nad dužnikom „PROGETTI BOSNIA“ društvo sa ograničenom odgovornošću Tuzla, ul. Proleterskih brigada br. 60, Lipnica, sa podružnicom „PROGETTI BOSNIA“ društvo sa ograničenom odgovornošću Tuzla-Podružnica broj 1 Gračanica, ul. Ograđenica b.b., Lukavica, dana 30.07.2025. godine donio je slijedeće,

RJEŠENJE

POKREĆE SE PRETHODNI POSTUPAK radi utvrđivanja uslova za otvaranje stečajnog postupka nad imovinom privrednog društva „PROGETTI BOSNIA“ društvo sa ograničenom odgovornošću Tuzla, ul. Proleterskih brigada br. 60, Lipnica, sa podružnicom „PROGETTI BOSNIA“ društvo sa ograničenom odgovornošću Tuzla-Podružnica broj 1 Gračanica, ul. Ograđenica b.b., Lukavica.

Za privremenog stečajnog upravnika imenuje Emir Nuhanović iz Živinica, Priluk 65.

Privremeni stečajni upravnik dužan je odmah po prijemu rješenja o imenovanju preduzeti radnje utvrđene odredbom člana 63. Zakona o stečaju, a naročito:

- obezbijediti imovinu dužnika i starati se o istoj,
- ima ovlaštenja da uđe u poslovne prostorije dužnik i provede neophodne radnje,
- utvrditi da li postoji razlog za otvaranje stečajnog postupka,
- ispitati da li će imovina stečajnog dužnika pokriti troškove stečajnog postupka,
- utvrditi da li se poslovanje stečajnog dužnika može u cjelini ili djelimično nastaviti u toku prethodnog postupka i
- uraditi kontrolu poslovanja stečajnog dužnika.
- kada je podnosilac prijedloga za otvaranje stečajnog postupka stečajni dužnik, dostaviti izjašnjenje da li je stečajni dužnik, odnosno organ ovlašten za zastupanje stečajnog dužnika podnio prijedlog za otvaranje stečajnog postupka u roku od 60 dana od dana nastupanja platežne nesposobnosti.

Privremeni stečajni upravnik dužan je podnijeti svoj pismeni izvještaj ovom sudu u roku od 30 dana od dana donošenja ovog rješenja u kome će izvijestiti ovaj sud o preduzetim radnjama i iznijeti svoje stručno mišljenje o tome da li postoje razlozi za otvaranje stečajnog postupka, odnosno da li postoje bilo kakvi izgledi za nastavak daljeg poslovanja dužnika.

Mjere pojedinačnog prinudnog izvršenja pokrenute protiv stečajnog dužnika se obustavljaju, izlučna i razlučna prava povjerioci ne mogu ostvariti u prethodnom postupku, stečajni dužnik ne može raspolagati budućom stečajnom masom bez saglasnosti privremenog stečajnog upravnika i suda, a sve to u cilju osiguranja buduće stečajne mase.

Rješenje će biti objavljeno u „Službenim novinama F BiH“, web stranici Općinskog suda u Tuzli i na Internet stranici FIA-e, te se pozivaju povjerioci da privremenom stečajnom upravniku bez odlaganja dostave prijedlog mjera osiguranja na predmetima stečajnog dužnika koje će eventualno zahtijevati.

Ovo rješenje će se dostaviti Odjeljenju registra ovog Suda, Zemljišno-knjižnom uredu Općinskog suda u Tuzli i Službi za geodetske i imovinsko-pravne poslove Grada Tuzla, radi upisa zabilježbe otvaranja prethodnog postupka.

Obrazloženje

„PROGETTI BOSNIA“ društvo sa ograničenom odgovornošću Tuzla, ul. Proleterskih brigada br. 60, Lipnica, sa podružnicom „PROGETTI BOSNIA“ društvo sa ograničenom odgovornošću Tuzla-Podružnica broj 1 Gračanica, ul. Ograđenica b.b., Lukavica, kao dužnik podnio je dana 05.05.2025. godine ovom sudu prijedlog za otvaranje stečajnog postupka nad ovim privrednim društvom, zbog platežne nesposobnosti stečajnog dužnika.

Stečajni sudija nakon što je utvrdio da je prijedlog za pokretanje stečajnog postupka podnesen od strane ovlaštenog predlagača u smislu odredbe člana 58. stav 1. i 2. Zakona o stečaju („Sl. novine F BiH“, br.53/2021. u daljem tekstu Zakon o stečaju) i da je isti dopušten, dana 03.06.2025. godine, naložio je predlagaču da uplati novčana sredstva na ime predujma finansiranja troškova prethodnog postupka radi utvrđivanja uslova otvaranja stečajnog postupka.

Predlagač je dana 19.06.2025. godine dostavio sudu dokaz o uplati predujmljenih sredstava za finansiranje prethodnog postupka u iznosu od 3.500,00 KM.

Na osnovu priložene dokumentacije i to; aktuelni izvod iz sudskog registra od 23.04.2025. godine, bilans stanja na dan 31.12.2024. godine, bilans uspjeha za period 01.01.-31.12.2024. godine, odluka o pokretanju stečaja od 28.04.2025. godine i uplate predujma od 3.500,00 KM, predlagač je učinio vjerovatnim platežnu nesposobnost.

Na ročištu za saslušanje stečajnog dužnika održanog dana 27.05.2025. godine, zastupnik izjavi da se društvo bavilo obućarstvom. Prvi problemi u poslovanju su nastali u periodu pandemije Covid virusa. Nakon toga društvo i dalje obavljalo djelatnost, imalo je ugovore i poslovalo je sa stranim kupcima-svjetski poznatim brendovima, međutim vremenom su isti smanjivali narudžbe ili skroz odustajali, pri čemu smatra da je na navedeno imalo uticaja i poremećaj na svjetskom tržištu zbog rata u Ukrajini. S obzirom na smanjen obim porudžbina od stranih klijenata što je dovelo do smanjene proizvodnje a samim tim i prihoda osnivači društva sud donijeli odluku da se napravi „pauza“ od nekoliko mjeseci i u tom trenutku (otprilike februar 2024. godine) su radnicima otkazani ugovori o radu i isplaćene otpremnine, osim radnika kojima u tom trenutku po zakonu se nije mogao otkazati i manjeg broja rukovodećih radnika (bolovanja i slično), a i njima su kasnije otkazani ugovori i isplaćene otpremnine. Prema radnicima i na ime doprinosa nema obaveza osim za njega kao direktora i jednu pravnicu i to samo za prošli mjesec. Društvo nema znatnijih obaveza po osnovu javnih prihoda (800,00 KM prema UIO BH). Društvo ima obaveza prema dobavljačima i to RPC Inkubator d.o.o. Lipnica za zakupe oko 18.000,00 KM i firma Global d.o.o. Sarajevo za kupovinu mašina oko 18.000,00 KM, firma Global je podnijela tužbu ovom sudu, a za RPC inkubator ne može sa sigurnošću reći mada mu je nagovješteno da će biti podnesena, a ima još nekih dobavljača sa manjim iznosima dugovanja. Društvo nema sredstava na računu. Društvo nema nekretnina u svom vlasništvu niti je imalo (djelatnost je obavljalo u zakupljenim prostorima), a u vlasništvu ima 40-tak mašina za proizvodnju obuće, procjenjene na 55.000,00 KM po vještaku Samiru Mršiću, s tim da ukazuje da se i u prethodnom periodu se raspitivao te da zbog stanja na tržištu društva koja se bave obućarstvom nisu bila voljna da kupe te mašine tako da je njihova tržišna vrijednost upitna. Mašine se nalaze u Lukavici kod Gračanice u prostorijama gdje je društvo obavljalo djelatnost od 2016. godine, i određena oprema – stalna sredstva u Lipnici. Takođe navodi da je prije nekoliko dana zaprimljen od UIO nalog za prinudnu naplatu duga po osnovu PDV-a

, a koji društvo neće biti u mogućnosti izmiriti, kao ni obaveze prema dobavljačima jer nema novčanih sredstava niti trenutno obavlja poslovnu djelatnost – proizvodnju (od 06.02.2024. godine do danas).

Iz svega navedenog proizilazi da društvo nije u mogućnosti izvršavati svoje dospjele obaveze od momenta dospjeća u neprekidnom trajanju dužem od 60 dana od dana nastanka obaveze. Konačno stanje u pogledu eventualno drugih obaveza bi se moglo utvrditi u slučaju određivanja privremenog stečajnog upravnika koji bi sudu dostavio izvještaj o poslovnom stanju kod predlagača sa izjašnjenjem o uslovima za otvaranje stečaja.

Na osnovu podnesene dokumentacije i zakonskog zastupnika stečajnog dužnika, sud nije u mogućnosti da sam procijeni postojanje svih neophodnih uslova koje Zakon predviđa za otvaranje stečajnog postupka, te se donosi rješenje o pokretanju prethodnog postupka radi utvrđivanja uslova za otvaranje stečajnog postupka nad dužnikom, temeljem odredbe člana 61. stav 1. Zakona o stečaju.

Odluka iz stava 3. ovog rješenja donesena je temeljem odredbe člana 63. Zakona o stečaju, a nakon što je utvrđeno da privremeni stečajni upravnik ispunjava uslove za imenovanje utvrđene odredbom člana 71. Zakona o stečaju.

Na osnovu navedenog, temeljem citiranih odredbi zakona, sud je odlučio kao u izreci rješenja.

Stečajni sudija
Vedran Milašinović

POUKA O PRAVNOM LIJEKU: Protiv ovog rješenja dozvoljena je žalba u roku od 8 (osam) dana, računajući od dana objavljivanja. Žalbu mogu uložiti stečajni dužnik i privremeni stečajni upravnik. Žalba se podnosi Kantonalnom sudu putem ovog Suda.